

## **L'IAS GRISCHUN È VEGNIDA PREMIADA SCO «FRIENDLY WORK SPACE»**

**Sco center da competenza per assicuranzas socialas en il chantun Grischun survegn l'IAS sco emprim institut d'assicuranzas socialas en Svizra e sco tschintgavla interpresa en il chantun Grischun il premi «Friendly Work Space». Cun quest premi undrescha la fundaziun Promoziun da la sanadad svizra organisaziuns che s'engaschan a moda sistematica per bunas cundiziuns da lavur per lur collavuraturas e collavuratur.**

L'IAS Grischun survegn il label «Friendly Work Space» da la fundaziun Promoziun da la sanadad svizra. Fin ussa han var 100 interpresas en Svizra survegnì quest premi. Las organisaziuns vegnan undradas per il management da sanadad en lur manaschi. En il rom dal giudicament ha l'IAS Grischun demussà ch'ella s'engascha a moda sistematica per bunas cundiziuns da lavur e per la sanadad da collavuraturas e collavuratur.

### **Criteria per il label**

Il sigil da qualitat «Friendly Work Space» sa basa sin sis criteris qualitativs che fan chapaivels e valitabels ils facturs ch'influenzeschan la sanadad da las collavuraturas e dals collavuratur. Sche las expertas ed ils experts independents conferman ch'ils sis criteris èn ademplids fin ad in tschert level, survegn l'interpresa il label. Ils criteris per il management da sanadad en il manaschi tenor «Friendly Work Space» vegnan sustegnids dal Secretariat da stadi per l'economia (SECO) e da l'Uffizi federal per sanadad publica (UFSP).

### **Niz per las collavuraturas ed ils collavuratur**

D'avair il label tuna gia bain. Ma tge han las collavuraturas ed ils collavuratur da quel? Tgi che lavura en in'interpresa cun il label «Friendly Work Space» profitescha en sia lavur dal mintgadi d'avantatgs considerabels sco per exempel:

- Commembras e commembers dal team e superiuras e superiurs che respectan in l'auter.
- Stima professionala e persunala fan part da la cultura da manaschi.
- Models da temp parzial e l'organisaziun da la lavur flexibla.
- La patruna sustegna la cumpatibilitad da la professiun cun il temp liber.
- L'attractivitat per famiglias è part da la cultura da manaschi.
- L'infrastructura moderna e la tecnologia nova simplifitgeschan la lavur.
- La lavur è variada e metta las collavuraturas ed ils collavuratur mintga di davant novas sfidas.
- Il volumen da la lavur è accordà cun las resursas.

### **Controlla cuntinuanta**

Trais onns suenter la premiaziun examinescha la fundaziun Promoziun da la sanadad svizra danovamain, sche l'IAS Grischun ademplescha anc adina ils criteris e po salvar il label. Cun il label «Friendly Work Space» vegnan mo premiadadas interpresas che s'engaschan a lunga vista ed a moda persistente per la sanadad en lur manaschi.

Ulteriuras infurmaziuns: [www.friendlyworkspace.ch](http://www.friendlyworkspace.ch)

Per dumondas: Urs Grischott, directur IAS Grischun, 081 257 41 00 / [urs.grischott@sva.gr.ch](mailto:urs.grischott@sva.gr.ch)